

Mientras cu e victima Koolman ta lucha pa su bida den cuido intensivo

Te ainda Polis no a logra haya e arma cu Lo-A-Njoe a tira cun'e

ORANJESTAD—Mientras cu e victima Jeanmark Koolman ta lucha pa su bida den cuido intensivo, te ainda Polis no a logra haya e arma cu Edmond Lo-A-Njoe a usa diabierna 8 di Juni na Macuarima, cu cual el a herida Koolman seriamente y Jonathan Thiel na su pia. E caso aki a conmove henter Aruba y te dia di awe e caso aki ta topico di combersacion serca hopi hende. Hopi hende no por kere con Aruba a para cambia asina caminda hobennan ta tira otro cu arma di candela. A dura algun dia prome cu

Lo-A-Njoe a entrega su mes, despues cu un batayon di Polis hunto cu miembronan di Arestatie Team a bay haci investigacion na cas di su mayornan.

VICTIMA SU SITUACION TA SERIO

Investigacion cu Bon Dia Aruba a haci ta mostra cu e heridanan di bala cu Jeanmark Koolman a sufri a afecta su organonan severamente. Te ainda Koolman ta interna den cuido intensivo caminda su situacion ta serio. Bon Dia Aruba por a compronde cu Koolman ta luchando pa su

bida. Bon Dia Aruba ta desea Koolman hopi forsa, fe, den e momentonan dificil cu e ta pasando aden y cu Dios laga e recupera pronto pa asina e ta serca su sernan keri.

NO A HAYA ARMA

Despues cu Edmond Lo-A-Njoe a entrega su mes, miembronan di Recherche a haci diferente interrogacion y un di e puntonan cardinal ta, unda e arma ta.

Ta asina cu durante e prome interrogacionnan, Edmond Lo-A-Njoe lo a papia di dos arma di candela y cu e lo a benta un den Spaans Lagoen y un otro e

lo a benta afo den e mondinan den bicindario.

Miembronan di Recherche a haci investigacion riguroso pero no a bin haya ningun arma. Esaki ta nifica cu un prueba importante no a wordo haya ainda, mientras cu di otro banda miembronan di Recherche tin suficiente testigo y hasta confesion di Edmond cu ta presenta suficiente prueba cu ta Edmond ta esun cu a tira na Macuarima y pesei ta responsabel pa e heridonan cu a cay.

ACUSACIONNAN SERIO
Miembronan di Recherche ya a

saca afo, kende a tira. Ta asina cu no solamente tin testigonan cu a declara cu ta Edmond a tira, sino cu Edmond mes a admiti di a tira. Esaki ta haci cu e acusacionnan contra Edmond lo ta hopi serio. Aki no ta papia solamente di un caso di intento di asesinato, sino un caso di posesion ilegal di arma di candela, un caso di intento di asesinato premedita y cu heridanan severo.

Lo bira interesante pa mira con Ministerio Publico lo bay baha riba Edmond Lo-A-Njoe, dia e caso aki bin padilanti.